

Lei Kriminaliza Difamasaun Sei Taka Dalam ba Implementasaun Lei-MPCC



Diretór Ezekutivu CEPAD, João Boavida. Imajen Tatoli/Egas Cristóvão

DILI, 17 julu 2020 (TATOLI)--Diretór Ezekutivu Sentru Estudu ba Pás no Dezenvolvimentu (CEPAD-sigla portugés), João Boavida, preokupa ba esbosu-lei Kriminaliza Difamasaun tanba lei ne'e sei taka dalam fali ba implementasaun ba Medida Prevensaun no Kombate Korupsaun.

“Ha'u preokupa maka esbosu-Lei Kriminaliza Defamasaun tanba ida-ne'e mai atu taka dalam fali ba implementasaun ida ba Lei Medida Prevensaun no Kombate Korupsaun. Hanesan ha'u dehan Lei difamasaun mai nakfilak ita sira kritika ne'e sai fali kriminozu. Tanba agora tama tan difamasaun ne'e, ha'u hanoin laiha razaun ita atu hamriik hasoru korupsaun tanba lei difamasaun taka dalam ba Lei Medida Prevensaun no Kombate Korupsaun,” dehan João Boavida ba Ajénsia TATOLI hafoin ramata programa Editor Club ne'ebé AJTL no CI realiza iha Salaun Konsellu Imprensa, Kintál Boot, Dili, kinta ne'e.

Nia konsidera, Lei Kriminaliza Difamasaun ne'e loke dalam ba ukun-nian sira atu abuza podér nafatin, tanba sira iha ona buat ida maka imunidade polítika.

Tanba, nia dehan, agora ne'e sira barak maka subar-aan iha imunidade polítika nia-laran, hodi nune'e bale evita impunidade ne'ebé sira iha la'os de'it maka imunidade maibé impunidade mós.

Aleinde ne'e, nia dehan, Lei Anti Korupsaun (LAC, **sigla portugés**) altera ba Lei Medida Prevensaun Kombate Korupsaun (MPCC, sigla portugés) mudansa iha linguajen maibé ninia objetivu ne'e ida-de'it tanba eatabalse atu kombate korupsaun iha Timor-Leste.

“Ha'u hanoin laiha diferença atu Lei Anti Korupsaun ka Lei Medida Prevensaun no Kombate Korupsaun. Ida-ne'e, mudansa iha linguajen de'it maibé ninia objetivu ne'e ida-de'it katak hamriik hasoru korupsaun iha Timor-Leste. Ne'ebé, bainhira Komisaun A aprova lei ne'e, ha'u hanoin di'ak ba ita hotu no liuliu ba sira-ne'ebé responsável involvidu iha programa atu prevene kombate korupsaun. Tanba, iha ona baze legál ida atu bele hala'o atividade,” João Boavida hateten.

Diretór ne'e dehan, iha Lei Anti Korupsaun transforma fali ba Medida Prevensaun no Kombate Korupsaun ne'e tuir informasaun ne'ebé nia rona katak ofisiál hotu-hotu iha nivél Governu nian tenke deklarasaun sira-nia rikusoan.

Nia hateten, lei Medida Prevensaun no Kombate Korupsaun ne'e atu hakat liu kedan to'o iha pontu ida dehan katak públiku mós sei iha informasaun ba deklarasaun ukun-nain sira nian kona-ba sira-nia rikusoan.

Lei Anti Korupsaun ka Medida Prevensaun no Kombate Korupsaun ne'e, nia konsidera, furak no animadu ne'ebé atu bele kontinua esforsu ne'ebé to'o ohin lonon sira halo Lei ne'e atu ema hotu-hotu bele la'o tuir.